

die dritt minut. vnd dienet zu dem new mon. In der andern tafel die erst linie  
helt aber die guldin zal. die ander stund. die dritt minut/vnd dienet zu dem  
volmon. Wiltu nun wissen new mon/so such die guldin zal des iarß darinn.  
du das wilt wissen in der ersten tafel/vnd wa du die vindest auff den selben  
tag wirt der mon new. so vil stund vnd minut nach mittag als die andern  
zwei linien anzeygent. In aller form vnd gestalt vindestu in der andern tafel  
den volmon oder bruch wie du yetz gelert bist vñ dem new. Merck auch mit  
gutem fleyß wa du hinde in der tafel new oder vol mon ain sollich zaychē [ ]  
vindest/ das die selben new oder volmon stund vnd minut sollen geno m=  
men werden auff den tag da sich sollichs zaychen von dem häcklin endet.  
als exempli gratia. Wann 17 die guldin zal wirt vindestu auff dem 22 tag  
des ienners das new 15 stund 18 minut nach mittag. vnd hinde das [ ]  
zaychen. dz zaygt übersich auff den 21 tag. darumb so wirt dz selb new auff  
den 21 tag des ienners 15 stund 18 minut nach mittag/ Des gleychen wan  
das zaychen [ ] vnder sich gat so wirt es auff den tag da es sich endet vnd  
sollent stund vnd minut allweg nach mittag gerechnet werden. In dem  
andern drey tafeln mit zwü linien vindestu in der ersten die tag leng. in der  
andern auffgang der sunnen. in der dritten vnd letzten vndergang der sunnē  
Vnd nach diesen tafeln stat ain a b c/ dienet zu der laß tafel hinde in dem  
Kalender wie dich der canon da selbst leren wirt

Das andertayl dieses kalenders sagt am ersten wie mā alle iar in ewig zeyt  
die guldin zal vinden soll vnd dar bey die schlüssel zal der beweglichen fest  
Der sunnen zirkel Sonentäglich buchstab. das interuallum/ das ist wie vil  
zwischen weyhennächte vnd der hern fastnacht ist so man singt in der kirch  
en *Esto mihi.* in welchem zaychenn der mon ist. Auch die beschreibung der  
eygenschafft vnd natur der zwelff zaychen/ wann der mon darinn ist was  
gut zethun oder zerneyden sey/ Die beschreibung der syben planeten vnd  
anderer stern des firmamentz Auch von den zwelff windē vñ ir eigenschaft  
wie dann das alles ordenlich die canones auß weyßent in diesem Kalender.